

Qalam

bilangan 97 Muharram 1378 Ogos 1958 70 sen

Menyiasat Bantuan Ekonomi Melayu

Suatu jawatankuasa, yang diketuai oleh Encik Ahmad bin Perang telah dilantik oleh Kerajaan Persekutuan Tanah Melayu untuk menyiasat cara-cara mana memberi bantuan ekonomi orang-orang Melayu yang membolehkan orang-orang Melayu melatih dirinya duduk sama rendah berdiri sama tinggi dengan bangsa-bangsa lain yang mendiami Persekutuan Tanah Melayu ini.

Sesungguhnya mengadakan jawatankuasa memikirkan bantuan-bantuan kepada ekonomi orang Melayu itu sangat mustahak supaya dengan penyelidikan yang sempurna kelak dapatlah diselenggarakan binaan-binaan yang berkesan kepada ekonomi orang-orang Melayu; dan sudah pada tempatnya pula Pengarah RIDA, Encik Ahmad Perang, sebagai ketuanya daripada pengalaman-pengalamannya yang telah dijalankan oleh RIDA sudah barang tentu banyak menolong menjauhkan daripada bantuan-bantuan itu indah khabar dari rupa - diberi pada bukan pada tempatnya kepada orang-orang Melayu.

Untuk menjalankan langkah-langkah penyiasatan ini, sangat molek kiranya penyiasatan itu dibahagi-bahagikan kepada beberapa bahagian yang berasing-asing umpamanya seperti ini:

1. Penyiasatan dalam bantuan di dalam membuka sawah ladang dan kebun.

2. Dalam perkara-perkara perusahaan perikanan.

3. Dalam perkara perusahaan-perusahaan kecil dan perniagaan.

Bagi menyelenggarakan penyiasatan ini semua -

tidak mustahak yang dikaji itu hanya cara mana hendak memberi bantuan dan pertolongan tetapi yang lebih utama dikaji dahulu keadaan dan tabiat bahagian-bahagian orang-orang yang hendak ditolong itu, sebab-sebabnya maka mereka lemah dan sentiasa susah.

Untuk ini perlu dikaji sebab musababnya tabiat-tabiat orang-orang kita dan setelah mengetahui ini barulah dirangka cara mana memberi bantuan yang berkaitan yang sesuai dengan tabiat mereka. Kerana sekiranya diberi bantuan terus dengan tidak menyelidik tabiat dan kebolehan serta kelayakan seseorang maka bantuan yang diberi itu tidak akan ada faedahnya kepada perkembangan umum ekonomi orang-orang Melayu; keadaannya kelak akan tidak memuaskan seperti yang terjadi kepada RIDA - memberi bantuan dengan tidak cukup penyiasatan tentang kelayakan akhirnya membawa kesan-kesan yang tidak baik.

Jika didapati bahawa tabiat-tabiat kebiasaan yang menjadi sebab runtuhnya ekonomi Melayu maka tidaklah seyoginya bantuan ekonomi yang dahulu mesti diberi tetapi hendaklah dibuat seperti bantuan jangka panjang untuk mengubah tabiat-tabiat yang melemahkan kemajuan ekonomi itu kerana sekalipun mereka diberi pertolongan namun pertolongan itu hanya buat sementara sahaja - sedang kesudahannya akan seperti biasa.

Cuba mari kita perhatikan keadaan-keadaan usaha orang-orang kita di dalam mengerjakan sawah padi. Sebagai contoh:

Tanjung Karang ada tiga golongan pesawah-pesawah iaitu yang terdiri dari orang-orang Melayu, Cina dan India.

Orang-orang Melayu di dalam usahanya hanya menumpukan usahanya pada sawahnya sahaja - apabila musim sawah habis ia tidak mengerjakan lagi tanah-tanahnya tetapi lain-lain bangsa sementara menunggu sawah di tanam semula mereka berusaha menanam barang-barang lain. Sehingga mendapat hasil-hasil yang baik sementara menanam musim yang lain itu. Di daerah-daerah lain, Acheh umpamanya peladang-peladang itu sementara menunggu musim menanam lagi mereka mengusahakan bertanam lada dan kerana itu di sana banyak mengeluarkan lada kering.

Ini ialah usaha-usaha yang boleh dibuat sementara menunggu musim - demikian juga banyak lagi usaha-usaha lain yang boleh dibuat untuk menguatkan kedudukan mereka.

Apabila kita pergi pula ke pantai-pantai maka telah lazim orang-orang pelawat itu usahanya di dalam laut itu sahaja - mereka sehabis bekerja laut baliknya tidur - atau pun duduk berbual-bual di kedai-kedai kopitiam ikhtiar-ikhtiar untuk menambah hasil dalam usahanya seperti beternak¹ ayam atau itik atau bertanam-tanam pun tidak dilakukan mereka. Jadi hasil mereka semenjak muda semata-mata menumpukan kepada usaha ikan itu sahaja.

Apabila kita lihat pula di dalam usaha-usaha kecil maka kesungguhan dalam kerja-kerja itu umumnya tidak didapati ada kepada orang-orang kita. Mereka tidak mempunyai kebolehan dalam meraikan pelanggan-pelanggan dan lemah dalam menyusun usaha dan tenaga.

Tetapi kalau kita lihat orang asing - mereka tidak pernah berdiam di dalam usahanya ini.

Asas-asas bagi seseorang yang hendak berusaha itu hendaklah ada beberapa perkara-perkara iaitu keyakinan, kerajinan, kesungguhan dan tawakkal kepada Tuhan sesudah berusaha sehabis-habis tenaga - tidak mudah patah hati dalam menjalankan usaha kerana semuanya ini adalah asas yang utama bagi tiap-tiap usaha yang mustahak dijalankan.

Tatkala memberi bantuan ini perkara-perkara yang tersebut ini mustahak benar diperhatikan kerana dengan kurangnya perhatian ini maka bantuan-bantuan itu tidak akan berjaya kesudahannya - hanya dalam menolong sementara sahaja kepada mereka sedang sesudah pertolongan yang diberi itu semakin susah maka dengan sendirinya pula, kerana kurang kesungguhan dan kerajinan keadaan mereka akan berbalik seperti sedia kala.

Di sebalik kepada perusahaan-perusahaan yang ada, banyak pula yang tidak mahu mengemukakan dirinya supaya mendapat pertolongan atau bantuan modal.

Sebab yang utama mereka tidak mahu meminta bantuan modal itu selain daripada syarat-syarat yang dikenakan, mereka pula takut memikul beban untuk membayar bunga pinjaman itu bahkan kelak mereka akan bertambah-tambah runting lagi disebabkan adanya hutang-hutang itu. Bagi orang-orang yang bermiaga berhutang modal itu berat benar tanggungannya.

Kepada usaha-usaha yang begini hendaklah didatangkan penyelidikan cara bagaimana meluaskan usaha mereka yang telah ada mempunyai keahlian di dalam usahanya. Umumnya kepada perusahaan-perusahaan seperti ini mereka tidak mahu modal tetapi yang dikehendaki mereka ialah pembelian kepada barang-barang yang diusahakannya atau pun pekerjaan-pekerjaan diberi kepada mereka sebagai bantuan membolehkan mereka meluaskan lagi usaha yang sudah ada. Kebolehan sudah